

REV. V. LALTHLAMUANA
LECTURER, JUBILEE BIBLE SCHOOL



1979 - 2021

A mi thianglimte thihna chu LALPA ngaih chuan hlu tak a ni."

A CHANCHIN TLANGPUI

Rev V. Lalthlamuana hi May 17, 1979 ah Upa V. Thânglura (L) leh Pi Saimawii (L) te inkârah Christian Hospital, Serkawnah a lo piang a, unau mipa 3 leh hmeichhia 1 an ni. A pa hian February 4, 2012 khan a lo kalsan tawh a, a nu hian July 2, 2012 khan a lo kalsan tawh bawk a, a unaupa, a chhang chiah Maênga hian December 1, 2019 khan a lo kalsan tawh bawk a ni.



An unau indawt danin:

1. V. Lalrinthangi (Marini)
2. V. Lalthlamuana h/o Judy Lalramdinpuii Chhakchhuak
3. V. Lalengmawia (L) h/o Lalrammuani Ralte
4. V. Lalhlimzauva h/o T. Zonunsangi

October 19, 2011 khan Judy Lalramdinpuii Chhakchhuak (Lunglei Bazar Veng) nen an innei a, fa an nei rih lo a ni.



ZIRNA LEH HNA THAWH

Primary atanga CI-XII thlang hi Zotlang leh Serkawn HSS ah a kal a, College hi JB College Lunglei-ah kalin, BA a zawh hnuin Carey English School, Zotlang-ah zirtirtu hna a thawk a, chumi hnû chuan Kum 2004 (Oct) khân Kohhran sponsor-a Pathian thu (BD) zir turin AICS ah a lut a, Kum 2008 ah BD hi tha tak in a zir zo a. BD a zir lai hian Worship Committee ah Secretary te pawh niin Chapel service leh program dang ah pawh a thawh hlawk viau a ni.



Rev. V. Lalthlamuana hi Mizo pa ah chuan palian tak leh sa tha tak ni in, mi hrisel leh in ‘fit’ tak a ni thin a. School leh College a kal lai pawhin infiamna (sports) lamah lawmman a lo dawng nual tawh nghe nghe a ni. Mi tumruh leh tualchhêl tak a ni a, mi taima tak leh invawng fel tak a ni bawk. Leadership quality nei tha tak a ni a, Pathian faka zai ngaina tak leh zai nuam ti tak a ni.

RAWNGBAWLNA

BD a zir zawh hnû hian kum 2009 khan HATIM ah reilote a thawk a. February 12, 2010-ah Pastor atana lak a ni a, Pro Pastor in Thingsai Bial (2010-2011) leh Zotlang Bial, Lunglei(2011-2012) leh Electric Bial (2012-2013) ah te a awm hnu in 10th March 2013 khan BCM Assembly, Lunglawn-ah Pastor puitling ni turin Rev F. Sangvela’n Minister atân a nemnghet (ordained) a ni. Nemngheh a nih hnu hian heng bial/hmun ah te hian a awm a.

1. Thingfal Bial, Bialtu Pastor (2013-2018)
2. Chipphir Bial, Bialtu Pastor (2018-2019)
3. Lecturer, JBS (2019 -)

Pastoral Ministry a a luh hnu hian Pro Pastor leh Pastor a bial hrang hrang a awmna ah hian, rawngbawlna ah a inpe bawk a, kohhran te ngainat a hlawh hle a. Naupang atanga kum upa ber thlenga kawm dan a thiam em em a ni. Amah a aw ri in a zir bawka, thusawi thiam tak a ni a, Bial pawn thlenga speaker atânasawm leh hman hlawh tak a ni a, Naupang Camping thlenga speaker atâna hman thin a ni. MTKP Inkhawmpui, February 2019, Tlabung-a neih ah khan ‘Mahni Inphat Hmangaihna’ tih thupui hmangin Sermon ropui tak a sawi kha, Inkhawmpui lian a a thusawi hnuhning a ni awm e.

A NAT DAN

BD a zir laiin a kâlah lungte a awm avângin harsatna a tawk a. Kum 2006 khan Greenwood Hospital-ah a kâla lung awm chu verh a ni a. He mi hnu lawk aţang hian thisen chhuak tawp thei lo (bleeding) a nei a, kum 2006 Sept-Nov ah khan bleeding avang hian Civil Hospital, Aizawl -ah te pawh a awm a, AICS student te pawhin a inhhawkin an awmpui thin a ni. Ziawm lam a pan theih loh avangin Kolkata panpui a nita a. Mahse, hemi tum hian Pathian thiltihtheihna mak tak mai lo thleng in Kolkata an thlen hian bleeding a tawp vek a, Pathian tihdamna changin harsatna nei lovin an lo haw leh a ni. Hemi hnu hi chuan harsatna em em nei lovin, tha takin BD zir chhunzawm in, a zo thei a, rawngbawlna phak ang tawka chhunzawm in a hun a hmang a.

Kum 2010 ah Pastor atana lak a ni a, Thingsai Pastor Bial-ah dah a ni a. Hemi kum hian thi chhawngin a awm leh a, Sept 2010 khan Aizawl Hospital-ah oxygen pek ngaiin a awm a. A kal mai dawn emaw tih hiala a awm hnu in, Pathian tihdamna a chang leh hlauh mai a, testimony ropui tak nei in Kohhran hote hnênah a puang chhuak thin. Kum 2019 khan Chhipphir Pastor Bial-a a awm laiin Lunglei Chanmari Pastor Bial Zaikûtpui-ah Speaker tura sawm a nih angin Lunglei-ah a lo kal a, Zaikûtpui an neih hma hian Hospital-ah a in chek-up a, chutah chuan a taksa a lo chak lo in, enkawl a lo ngai hle mai a ni tih hriat chhuah a ni a, Hospital-ah an admit zui ta nghal a, Zaikûtpui-ah pawha speaker zui thei ta lo a ni. Mizoramah engemawchen an inenkawl hnuin Christian Medical College, Vellore-ah August-Sept 2019 khan an kal a, hun engemaw chen Vellore ah an inenkawl hnuin kal thlak (kidney transplant) ngai a ni tih an hria a. Nimahsela, Pathian tihdamna a chang a, Pathianah damna puangin Mizoram ah an haw leh phawt a.

Mizorama an haw hnu hian a nau duh tak mai Pu V. Lalengmawia (Maengaa) chuan December 1, 2019 khan a kalsan thut mai a, a nau thihna hian a khawih na êm êm mai a. January 2020 ah a chau deuh a, Christian Hospital, Serkawn-ah admit a ni a, February 2020

khan Aizawl Hospital-ah Helicopter hmanga phurh phei a ni a. April 2020 ah Lunglei-ah rawn phei leh in, kar khatah vawi thum te dialysis a la a. Kolkata lamah Kidney Transplant tura kal tura an inbuatsaih lain Covid-19 avângin an kal thei lawk lova. October 8, 2020 khan kâl thlak turin Kolkata an pan thei ta a. Rabindranath Tagore Institute of Cardiac Sciences, Kolkata-ah admit a ni a. A kala bâwk (cyst) awm chu hlawhtling takin an paih phawt a. A kal thlak tura Doctor ten an buatsaihna ah hian an thlak loh tur zawk (a pahnih hian a tha lo ve ve a ni) paih hmasak a ngai a, chumi tura an buatsaih lain a BPhniam thut in a chau zui ta a, Doctor ten an khawih ngam ta lo a ni. Hemi atang hian a tlahniam chho zel a, tlemahan kang deuh chang awm thin mahse hniam lam a pan zel a lo ni a, June 1, 2021, zinglam dar 8:15 khan min lo kalsan ta a ni.

LAWMTHU

Rev. V. Lalthlamuana damlohna chungchang ah hian Mizoram leh Mizoram pawna Kohhran hote tawngtaisakna leh duhsakna hi a dawng nasa em em a. A nat tirh atangin, vawiin thlengin bang lova tawngtai sak mai piah lamah duhsakna thilpek a dawng nasa em em a. A hminga appeal kan siam te kohhran hoten ngai pawimawhin tanpuina engemawzat a lut a, Kohhran leh mimal amah lainata tawngtaipui reng thin te hnenah Rev.V.Lalthlamuana chunghte leh BCM Puipa ten lawmthu kan sawi takmeuh a ni.

Kolkatta an awm chhunga amah duat tak leh hmangaih taka buaipuitu Regional Office-a hotu leh thawktu te, khulai hmuna a rawngbawlpui leh thian thaawm te, englai mahin an thlahthlam ngai lo va,a tana an tih theih zawng zawng an ti vek a ni, anni ho chungah hian lawmthu kan sawi mawlh mawlh a ni.

Rev. V. Lalthlamuana chungchangah hian kan Sorkar hotute;Minister leh MLA te, kawng hrang hrang in, a damloh lai atangin hma an lakpuiin an chhawmdawl a. Kolkata Mizo Welfare leh Kolkata Mizo Patients Fellowship ten an thlenthlak tirh atangin tawngtaipuina nen theihtawpin an chhawmdawl a, Kolkata JRC leh a thawhpui te pawhin a ruang hawpui dan tur leh tihfel ngaiyah theihtawpin an pui bawk a. Mizoram Sawrkar hotu te leh DRC Silchar ten a ruang hawpui dan turah ruahmana fel taka siam in, Silchar YMA te nenAirport ah lo dawngsawng in Mizoram thlenga anmahni phurhna tur Motor ngaihtuahin an pe a. Synod Mission Compound Silchar-ah, kan unau Presbyterian thawktu ten breakfast nena lo hmuak in an lo dawngsawng a. Heng zawng zawng avang hian lawmthu kan sawi mawlh mawlh a ni.

Aizawl atangin Kohhran hruaitute leh a rawngbawlpui ten Vairengte ah an lo hmuak a, Mizoram an rawn rap a, Vairengte Police Checkgate ah Duty ten pangpar lo hlanin, kawng

tuaniPastor Bial hrang hrang a rawn paltlanga amah lainattu Kohhran hote leh mimal ten lodawngsawng zel in Puan leh Pangpar te lo hlan in, an lo thlah zel a, a makin a ropui kan ti a, kan lawm takmeuh a ni.

Ka huntawng kan hre theuh a, Covid-19 hrileng avangin duh anga chet leh thiltih zung zung theih a ni lo va. Hemi chungchangah YMA leh VLTF, Serkawn leh Zotlang ten theihtawpin a ruang dah dan tur leh vui dan turah te fel tak in ruahmanna an siam a.BCM Zotlang in vuina inkhawm buatsaih leh a kaihhnawih buaipui ngai zawng zawng te buaipui in hma an la a ni.

Heng zawng zawng ah hian BCM Puipate leh Rev. V. Lalthlamuana chung ten lawmthu kan sawi tak zet e.

.....

ENGE AN SAWI ?

Rev V Lalthlamuana nen hian Lawngtlai area-ah kan awm ho a, chutih lai chuan Thingfal bialah an awm a. Kum thum dawn lai inhnaih tea kan awmhona atangin a nihna chiang taka ka hmuh zinga thenkhat chu:

- *A rawngbawlna dal thei tur thildang engmah a ngaihtuah lo.*
- *Pathian hi a hmuchiang em em a, chuvangin a hmangaih tak takin ka hria.*
- *A bial a enkawl hneh em em a, a awmchungin thilpek leh kawng tam takin hma an sawn tih ka hmu bawk.*
- *Mi chi hrang2 upa, thalai leh naupangte a kawm thiam em em vek bawk.*
- *Pastor thlarau bo vei em em a ni a, naupangte zinga rawngbawl pawimawhna a hrechiang hle.*
- *Rawngbawlpui nuam leh hruaitute thuawih ani.*

Hetiang mi, Pastor tur renga piang kan then ta hi Bcm hian kan chan nasa hle. Ka va ui che em, Muana !

▪ **Rev. R. Lalbiakliana, AGS (Service)**

Pro Pastor a nih laiin Zotlang (Lli) bialah kan awm dun a. Muana hi Pastor tur renga piang niin ka hmu. A thlarau mi a, kohhran hote thlarau nun a hmufiah a, thusawi a thiam a, amah a lian ang bawkin a aw a lian a, a tha em em. Tun lai huna rawngbawl turin tun lai mite nun a man chak a, an hnena rawngbawl turin a inher rem thiam em em a ni. Pastor tha ni tura qualification tam tak hi amahah khan ka hmu a ni. Muana hi ka ui hle mai.

A natna hian a buan rei em em a, amah lah a tuar a chhel, a fight chhuak ta lo mai a ni e. Tunah chuan Chawlhna ram nuamah Lalpa hnenah min chawlhsan ta. Keini pawh kan la kal ve ang. A nupui leh a chhungte Lalpan hmangaihna banin kuangkuah tlat rawh se.

- Rev. PC. Liandula

Rev Muana chu a pawl tak zet a ni, BCM hian kan va chan nasa ve maw le aw ! Muana hi pastor tha leh inpe, uiawm em em dang leh chu a ni. BD a zir lai atang tawha inpe, aw thum tha, zai peih leh 'praise and worshi' hruaitu tha em em, thlarau lama mi tui a ni, ka ui hle mai !!

A zir lai atang tawhin a hriselna hi a sawisel tawh a, kum khat deuh thaw 'sick leave' a la a, BD erawh a zir zo thei a, pastoral ministry ah a lut a, nemnheh a nih hnu ah Bial hnihah a pastor a, a la thawk rei hman vak lova a natna hian a tlak buak ta a ni. Hospital hrang hrangah enkawl a ni a, a kal pawh thlak a nih hmian hetiang hi a thleng ta, a pawl tak meuh a ni. A nu leh pa an awm tawh lova, a nau Maenga BCM Printing Press manager pawhin a boral san a, an lainatawm takzet a ni. A kalsan an chhungku; a nupui Judy leh a u leh naute Lalpan awmpuiin thlamuan zel rawh se!

-Rev. Dr. RL Hnuni

Rev. V. Lalthlamuana (a.k.a Thlatea) nen hian kum 1995 khan Christian High School Serkawnah Pawl kua (9) kan zir dun a. Tlar khata thu thin kan ni. Chuta tang chuan Pawl 12 thleng kan in-classmate chho ta ngar ngar a. Kum lamah inrual khat reng mah ila a pumrua a lian tha a, thiante tan pawh a thlamuanpuiawm hle.

Thlatea hi mi danglam bik, mi puitling tak a ni a. Keiniho changpat chehchhum ang maia kan tal mai mai laiin ani chu KNP zirtirtu a ni der tawh! Mi pawisawi lo, high sikul kan kal lai ațanga Pastor sa ruih mai hi a ni a. A tet té ațanga Pathian rawngbawl ngainá leh Kohhran mi em em a ni.

Pawl 12 kan pass hnu khan mahni seh seh mualah tiin zirna avangin kan inthen ta vang vang a. Khami chhung khan kan inbe ngai lo; khatih hun lai khan tunlai angin phone hman a awlsam lo bawk a. Tichuan, mak tak maiin kum 2004 khan AICS-ah Pathian Thu kan zirho leh a. Kum 2009 November thla-ah Pastor hna thawk turin Baptist kohhranin min laho leh a. A kum leh 2010 February ni khat ațangin kan hna kan zawm tlang a. Kum 2013-ah Rev. F. Sângvela'n BCM Assembly @Lunglawnah min ordain rual leh.

*Thlatea hi mi belhchian dawl tak, fiamthu duh angreng tak, ho hauh si lo a ni!
Vawiin a liam ni hian lung a leng teh e. Engtin tak min ngai ve ang maw?*

▪ **Rev. Lalrohlua Pachuau, Asst. Professor, AICS.**

LALPA TANA HRAN TUM VAL REV. V. LALTHLAMUANA THLAH NAN

Muana hi Lunglei Zotlang tlangval a ni. BD zirin kum 4 AICS ah kan awm hova. Pa cool tak mai, mi ti zawk zawk lo, pa oving leh lian lam, mi inngaitlawm tak a ni. Amah hretu apiangin a chanchin kan sawi a kan rilrua lo lang ngei ngei chu a aw thum tha tak mai kha a ni. Lalpa rawngbawl tura mi inpe rum rut a ni.

BD kan zirlai khan Muana hian a kal lam natna hi a nei tan a. Thawkhat lai pheih kha chuan thih ngamin a na a, a thianten hospital lamah a inchhawkin kan riahpui thin a. Natna hrehawm tak tuar chung khan a chhel hle a, a tlawmngai em em bawk a. A natna kha hneh a tum tlat thin a ni. Zankhat chu thianpa Zara nen kan riahpui tumin YMA thuthlengah a khum bulah kan thu a, a khum bawhin kan lo muthlu a. A chetdan dik lo deuh a awm avanga kan han harh meuh chuan a zunbawm (urine bag) chu thikhar hlirin a lo khat tawh a. Civil Hospital lamin catheter an neih remchan tawh loh avangin Greenwood Hospital lamah kan va lam chuk chuk a. Chutiang hunah te chuan phunnawi lovin a tuar a, dawhthei takin a lo nghak fat fat a. Khati khawpa thi (khar vek khawpa chhuak nasa) chhuak nasa tawh ah pawh khan a riahpuitu a thiante kha min tihbuai hlauvin a lo tuar ngat ngat mai a lo ni. Chutianga pa tlawmngai leh chhel chu thianpa Muana kha a ni.

Muana khan Pathian fak nuam a ovin em a, a ning ngai lo. Ka mitthla ah hian Pathian faka a zai, a kut hum ruh chung a ban a phar chhuaklai hi a cham reng thin. A aw a thum tha si a, amah a len that baw k avang khan tihtak zeta Lalpa a fak kha a tak bik a, a faka tan pawh a lawmawm leh zual hmel hlih hlih in ka hre thin. Chutianga “fak duh thinlung” neitu chu thianpa Muana kha a ni.

Vanduaithlak taka a natna a lo chhuah leh hnu pawhin theih ang oving a chanchin kan ngaihven a. Whatsapp group lamah pawh a chanchin kan inzawt chamchi a. Amah a awm ve reng avangin a chanchin rawn sawi mai tura han beisei chang te kan nei baw k a. Pa tlawmgai leh inthlahrung tih takah, a tawpkhawk ah bak a chanchin a rawn sawi ngai lo. Mahse, kan beisei aiin a tha chak ta lova, nikuma Kolkata a kal dawn meuh kha chuan kan nawr na ta deuh baw k a, a khat tawkin chanchin a rawn update thin a. Hri laka an him theihnan te, kal donate tur a nau nen an inmil ngei theih nan te, sum leh paia an mualpho lohnan te a ngen oving kan lo dilsak a. Tluang taka an thlen thlak thu te a rawn sawi ta zel a, October ni 11, 2020 khan a chanchin rawn sawi pahin, “Tawngtainain min lo chelh reng dawn nia, Lalpan kan tan a mi te a lo dah zel hi a mak ka ti,” tiin natna hrehawm leh manganthlak karah pawh a rin Pathian thatna leh rinawmna a hmuh hmaih lo.

Beisei nei taka kan lo tawngtaipui ovi, a pum puar avanga doctorten an zai leh phawt tur thu a rawn sawi leh a. Chanchin a rawn update apiangin Pathian hnena lawmthu sawina tur point a rawn telh ziah a. A nau Zautea leh a farnu leh a nupui ten an kal donate duh mah se, doctor ten an fit lova an hriat thu a rawn sawi leh a, chumi tum meuh chuan, “rilru a hah duh kher mai” a rawn ti a ni. March ni 8, 2021 khan Whatsapp group lamah a rawn lang leh boh a, group a kan titi leh rawngbawl na chanchin a lo chhiar ve zel thu te, khawharna leh rualawhna in a tuam thin thu te a rawn sawi a. Chung chu eng dang vang ni lovin Lalpa rawngbawl leh thuai thuai a chak avang a ni. Chuvang chuan a ni thianpa Muana hi “Lalpa tana hran tum val” tia ka sawi deuh kher ni. A kum a la naupang a, beisei leh hmathlir thui tak neiin, a theihtawpa Lal Isua rawngbawl kha a tum ruh em ovin a. Kal (kidney) transplant beiseia nghak mek si, major operation dang hmachhawn leh phawt a ngaih thu te, donor chungchangah an tluan loh thu te, an tum loh deuh deuha sum an sen nasatzia te a rawn sawi a. A mang a ang tak zet niin kan hria a. Kan thiam tawkin kan hnem hlawm a. March ni 12 ah tawngtaipui tura a thiante min rawn ngen lehin, a kal thlak loh tur zawk paih phawt tur a nih thu a rawn sawi leh a. Hei hi whatsapp lama a rawn lan hnunung ber a ni ta a ni.

Chanchin hre hmasa apiangin a chanchin kan inhrilh chhawng a. Beisei nei sang takin Pathian hmaah kan kunpui a. A chanchin tha lam aiin a tha lo lam kan hre chho ta zeuh zeuh

a. Chhel taka tuarin, Lalpa tana dam tum leh rawngbawl leh ngei tumin a theihtawpin a bei a. Amah hmangaihtu Lalpa erawh chuan nat leh hrehawm awm tawh lohna ah, a ke bula a rawngbawlsak turin a ko haw ta zawk a ni. A tawpnan leh amah thianpa Muana thlahnan, amah ngeiin AICS chapel ah maimitchhing suar suar leh uar taka solo-a a lo sak tawh hi ka'n quote I ang:

***Shackled by a heavy burden, 'Neath a load of guilt and shame
Then the hand of Jesus touched me, And now I am no longer the same
He touched me, oh, He touched me, And oh, the joy that floods my soul!
Something happened, and now I know, He touched me, and made me whole.***

Thianpa, nang chu natna leh manganna phurrit ten an tibuai tawh oving che. I fak thin leh a rawng I bawlsak Lalpa ngei chuan I banah chelh che in, hlimna leh lawmnain I khatliam tawh bik si a. I awhawm mang e!

- **Samuel Laldusaka, Agartala, Tripura**

RAWNGBAWL DUH REV. V. LALTHLAMUANA...

Pa insum thei leh invawng ani. Mahni a inthunun tha a, a inpeknaah a chiang a, Pathian tan a in vawng thianghlim a, zuk leh hmuam a tih awm reng reng ka hre lo. Lalpa rawngbawl tura serhhran anihna hi a hrechiang a, amah a in vawngin Lalpa tan a inpe pumhlum em em a ni.

Rawngbawlna tlanchhiat san tumlo a ni. Rawngbawlna chanvo pek reng rengin a tlanchhe ngailo. A hma awm chu hlenchhuah tum tlat mi a ni. A aw a lian tha em em a, zai hruai atan duhthusam a ni. Zai an hruai hi zai a nuam in a nung em em a, midangte tan pawh zawm a chakawm thin. Thusawi a thiam a, a aw ngaihthlak a nuamin beng a fah. Kum reilote chung pawh hian kan pastor thusawi mi zinga chhiar a ni hman hial a ni.

Mahni inthunun mi a ni. Madam Dr RL Hnuni khan zing dar 5 velah min kaitho thin a, thenkhat tho tlai chu min man fo a. Kum li chung chuan thawh sual tum leh peihloh chang pawh a awm thin. Muana erawh a man awm reng ka hre lo.

A tuar chhel. BD kum hnihna kan zir lai atangin a natna a lo chhuak tan a, chu chuan harsatna a siam a, phai pan hial ngaiin a awm. Aizawl-a a in enkawl chungin a chhel em em a, a na tuar leh hmel hlimlo min hmuh ngailo. Civil Hospital-ah admit a ni a, zirlai kan nih avangin a inchhawk a kan awmpui leh riahpui a awm. Zan khat pheih chu kan mangang a,

AICS a thiante kan phone a, zanlaia an lo chhoh hial a awm. Chungah te pawh thlaphang hmel a awm lo a, min la hnem in min thlamuan hial zawk a ni.

Rawngbawl a duh. A natna avanga duh anga rawng a bawl theih loh chang a awm. Dam a duhin a chak em em a, dam a tum tlat a, Pathianah a innghat tlat a. Pathian a nghak fan fan a, a beidawng ngailo. Dam a chakna chhan ber pawh Pathian tana rawngbawl a, a theihna zawng zawng hlan a duh. Tihur leh hmabak la ngah em em in a in hria. Dam takin lo haw se rawngbawl na ropui leh hlawhtling tak a nei ngei ang.

I tan hian theihtawp chhuahin kan lo tawngtai a, dam taka lo haw turin kan beisei che asin. Kum 15 chhung zet tina a tibuai thin che hian a tina leh tawh ngailo ang che. He natna hian a hneh che a ni lo a, Lalpan a hnehsak che a, a tuam dam zawk che a ni. Nat leh hrehawm awm tawhlohna-ah chuan leng la, A rawng I bawl Lalpa hnenah thlamuang takin chawl ang che. I nupui leh unaute Lalpan lo awmpuiin hruai zel rawh se.

- **Rev. ZD. Lalrozuala**

Tunge Muana chu?

Pathian Thu atchilh mi a ni. Kan inhre chiang chho deuh deuh a, mi rintlak tak leh Pathian rawngbawl nuam ti êm êm mai, Pathian hmangaihna lo tahpui nasa ve hle tu a ni tih ka hre zel a. Krista hnena hnungtawlh tawh te hruai kir hi a thupui ber pakhat a ni a. Pathian thu zir lai kan nih ang tak khan Pathian thu a tuipui êm êm a. Pathian thua titiho te kha nuam a ti êm êm thin. Pathian thu hriatthiam loh lai nei, lo zawttu te pawh hi hrilhfiah hram hram a tum thin.

Pathian fâk leh chawimawi a ning ngai lo. Pathian faka zai kha nuam a ti êm êm a, Zaipawl leh Male voice ah te khan a thawh hlawk hle a. Singspiration kan neih thin te kha a nghakhlel thei êm êm a, theihtawpin a kut te phar chhuakin Pathian a fak thin.

‘Ka chhinchhiah tawh che’ (Isaia 49:15-16). Tumkhat chu kum 2006 Sept thla khan thisen chhuak tawp thei lo (bleeding) a nei leh vak mai a, Civil Hospital, Aizawl-ah dah luh a ni a, 2006 Nov thla thleng kha a awm tain ka hria. A khum mawngah khan Isaia 49:15-16 thuziak hi a tar a. A hnua a sawi dan chuan, “Ka harh apiang khan ka chhiar thin a, Pathian kutphaha chawl hahdam ang mai hian ka inhre thin. Lalpa kutphah chuan min chhinchhiah reng a ni” a ti a. Helai Bible chang, “...nimahsela Kei chuan ka theihnghilh lo vang che” (Isaia 49:15) tih hi a duh em em thin a, a testimony hi midang hnenah pawh a puang chhuak fo thin.

Mahni inthunun thei leh invawng fel mi a ni. Personal devotion hi a ngai pawimawh êm êm thin a. A room-a kal tam ber pawl kha ka nih ka ring a, ka hrechiang êm êm a ni. Mahni inthunun (self-discipline) thei tak mi a ni baw. Incheina kawngah leh room tihfai kawngah pawh mi invawng tak mai a ni a. Zuk leh hmuam kawngah pawh a fihlim thak a, rawngbawltute zûk leh hmuama fihlim tur pawhin a zirtir nasa a, sawi pawh a sawi ngun viau. Pa lian tak si nunnem tak mai kha a ni a, a bula awm a hahdam thlak viau thin. Kan infiam nasa thin viau naa a thinrim hmel hi hmuh tur a awm ngai lo.

Mahni inkhawngaihna a nei ve! Thingsai Biala a awm lai khan 9th Sept 2010 ah Tarpho-ah inneihtirna a nei a, a haw leh hnu aţang khan a lo damlo châr châr chu niin, Aizawl-ah an phurh thlak chuan a lo chau tawh hle hi a lo ni a. Aizawl Hospital-a thawk ka hmelhriat pakhat ka phone a, a damchhuah a rin tawh loh thu min rawn hrilh a. Hemi tum hian a unaute pawh khan a kal tawh mai an ring a ni.

Thingsai aţanga Aizawl Hospital-a an phurh thlak zân hian tihian a sawi a, “Khum ruak a awm loh avangin damlo nawr lirinna khum te (trolley) ah chuan Casualty varandah, kawngpui kiangah mu tur in min ti a. Ruah atla a, boruak a vawt ţan tawh a. Beisei tur dang ka nei lo. Mahse min khawngaih vangin Corridor, mi veivahna leh inthiarna bulah chuan min mut tir leh ta zawk a, ka lawm hle. Paula tan Pathian khawngaihna a hmuh chian theih nan khawngaih ngai dinhmuna awm a ţula, Lalpan a phal sak anih kha (2 Kor 12:9). Chutiang chuan ka tan pawh Lalpa khawngaihna ka hmuh chian zel theih nan dinhmun khawngaihtlak taka ka awm kha alo ngai alo ni” tiin a testimony a sawi a ni.

Pathian rawngbawl châk mi a ni. Pathian rawngbawl châk êm êm mai mi a ni a. A khât tawh hian kan inbe thin a, chuta a sawi tam ber chu rawngbawl tura a chhuah na tur te, camping leh crusade a neih tur thu te kha min hrilh thin. AICS-a kan awm lai khan 11-14 December, 2018 chung khan BCM Pastors’Conference kan nei dawn a, AICS-a a thianpa awm ta chu tiin Pastors’conference ţan hma December 10, 2018 zan khan riak turin AICS-ah kan hnenah a lo thleng hma a. Kum thar maia Chhipphir Pastor Bialtu tura sawn a ni a, Chhipphir Bial kohhran dinhmun te min hrilh nasa êm êm a. Rawngbawl a tum dân hrâng hrâng te pawh min hrilh a, kan hlim hle a, kha zan kha tih takzeta kan inkawmna hnuhnung ber chu a lo ni ta. Chhipphir-ah chuan an insawn ta ngei a, nimahsela, rei pawh an awm hmain Chhipphir aţanga lakchhuah ngaiin damlohna in a tlakbuak zui ta a ni.

Kum 2019 khan Chhiphir Pastor Bial-a a awm laiin Lunglei Chanmari Pastor Bial Zaikûtpui-ah Speaker tura sawm a nih angin Lunglei-ah an kal a. Zaikûtpui an neih hma hian Hospital-ah a in chek-up a, chutah chuan a taksa a lo chak lo in, enkawl a lo ngai hle mai a ni tih an hria a, Hospital-ah an admit zui ta nghal a, Zaikûtpui-a speaker hnâ pawh chu a thawk thei ta lo a ni. Mizoram-ah an inenkawl hnuin Christian Medical College & Hospital, Vellore-ah August 2019 khan an kal a, hun engemaw chen Vellore ah an inenkawl hnuin Pathianah damna puangin Mizoram-ah haw turin Bangalore lamah an lo kual a. Bangalore-ah kan quarters-a thleng tura ka beisei laiin a nupui Judy cousin (Hlimhlimi) te an awm thu leh, an hnenah an thlen thu min rawn hrilh a. Kan rawn tlawh tal ang che ka ti a. Kan ðianpa Rev Mahruaia Chhakchhuak nen September 17, 2019 zan ah khan kan va hmu a, chawte kan ei tlang a. Hlim takin Pathiana damna a puan thu te leh Pathiana a rinna te chu a sawi a. Kha kha kan inhmuh hnuhnun ber a lo ni dawn ta, nakinah vanah kan la inhmuh leh dawn a ni. Mizoram-a an haw hnuah pawh phone hmang chuan kan inbe zauh zauh a, a hnuah pheih chuan phone a biak theih a ni ta lova, a nupui a hmangaih em em Judy Chhakchhuak ka be ta ðhin a. A birthday May 17, 2021 te khan Birthday wish ka va thawn hram a. Mahse...mahse a ni chuan min chhang thei tawh lova. A nupuiin min rawn chhang a... A dinhmun a hniam zel thu kan hria a, 1st June, 2021 dar 8:15am khan ka ðianpa leh unaupa chu Lalpa hnenah thlamuang takin a chawl ta tih kan hre ta a ni.


▪ **Rev. Joe Laldinpuia, UTC, Bangalore**

Rawngbawlnaa inpe pumhlawm tawp mi a ni a, a thlarau mi a, thusawi pawh a thiamin Pathian pawhin a hmang hle. Tum khat chu Thingsai biala Pro Pastor-a a awm laiin a natna a chhuak leh a, khawsik tlunin engmah tithei lovin a awm a, Bial chhuahsan a hreh avangin hmunpui lam pawh a lo pan duh lova. Rev. Lalthangliana Hnamte, khatih laia Pastoral Co-ordinator te Thingsai tlawhin an motorin an rawn phur thla a, Hnahthial South Biala Pro Pastor-a ka awm lai a ni a, Quarter-ah an rawn chawl thla a, Muana chu motor atanga chhuk pawh chhuk thei lovin motor seat awn deuha dahin an thut mut tir a, puan lum a lo sin hlun a, "Enge i an?" ka han tia, hlim hmel put luih tum hram hram chung hian, "Ka tha e, ka ngaihtuah awm loh" tiin min chhang a. Pu Thangtea khan a rugin, "Bial chhuahsana hmunpui pan turin Upate pawhin an lo ti a, mahse, a chhuak hreh tlat si a, kan rawn phur thla ngawt a nih hi" a ti a. Kha tah khan rawngbawlna a dah pawimawh zia ka hmuin ka hria.

A natna lo kawl tawh hian a tibuai ve reng a, chuti chung chuan theih tawp chhuahin Kohhran enkawlin a inpe hlawm tawp thin a, damsam lo chung rawngbawlna a hlenchhuah tam tak sawi tur a awm. Pastor rawngbawl hna hi kum 10 vel awrh a thawk a, a natna avang hian inenkawl a ngai a, tlem laia a whatsapp status-ah chuan dam taka rawngbawl leh thuai a chak tawh thu a rawn post a, amah pawhin chumi tur chuan theih tawpin a bei tak meuh meuh a, nimahsela, vawiinah chuan Lalpa'n he leia rawngbawl tawh lovin rawngbawlna sang zawk thawk turin a hnenah a ko hawng ta.

Thianpa, Vawiina 'Van hlado' chhamtute zingah i lo tel ta hi i tawrh nat dante ka ngaihtuahin ka lawmpui che a, chutih rualin ka va han ui tak che em... He lei kumtluang atan chuan mangtha rih phawt le...

▪ **Rev. Aibula Fanai**



REV. V. LALTHLAMUANA

LECTURER, JUBILEE BIBLE SCHOOL

VUINA INKHAWM

BCM Biak In, Zotlang, Lunglei,

3rd June, 2021 @ 11:00 a.m



1979 - 2021

HRUAITU

Rev. V. Vanlalchhunga
Bialtu Pastor
Zotlang Pastor Bial

VUITU

Rev. Dr. C. Vanlaldika
AGS (Mission)

THUSAWI

BCM Aiawh

Rev. F. Ramdinmawia
General Secretary
Rev. C. Chhuntluanga
Director, Pastoral Dept.

Tualchhung Aiawh

Upa Lalrinliana Punte
Secretary, BCM Zotlang

Chhungkaw Aiawh

Rbt. V. Lalthlimzauva

Chhungkaw tana tawngtaisakna

Rev. Dr. V. Laldingliana
President

Bible chhiar

P.P. Lalhimpuaia Khiangte
Upa C. Lalthanmawia
Chairman, BCM Zotlang

MALSAWMNA

Rev. B. Lalrinawma

THLANMUALA TAWNGTAI

Upa R. Lalmangaiha

"A mi thianghlimte thihna chu LALPA ngaih chuan hlu tak a ni."

Vuina Inkhawm hi "Baptist Church of Mizoram" YouTube Channel-ah Live a ni ang